

萬有文庫

第二集七百種

王雲五主編

張燕公集

(上)

張說撰

商務印書館發行

張燕公集

(上)

張說撰

國學基本叢書

張燕公集

下
張訥撰

國學基本叢書

王雲五主編
萬有文庫
第二集七百種

張燕公集
二冊

中華民國二十六年六月初版

撰者 張 說

發行人 王 雲 五
上海河南路

印刷所 商務印書館
上海河南路

發行所 商務印書館
上海及各埠

五五六一六六

朱

(本書校對者潘其璠)

提要

臣等謹按張燕公集二十五卷。唐張說撰。說事蹟具唐書本傳。其文章典麗宏瞻。當時與蘇頌並稱。朝廷大述作。多出其手。號曰燕許。唐書藝文志載其集三十卷。今所傳本止二十五卷。然自宋以後。諸家著錄並同。則其五卷之佚久矣。集中元處士碣銘。稱序爲處士子將作少監行冲撰。而唐書行冲傳。乃不載其爲此官。爲留守奏慶山醴泉表。稱萬年縣令鄭國忠狀。六月十四日。縣界霸陵鄉有慶山見。醴泉出。而唐書武后傳載此事。乃作新豐縣。皆與史傳頗有異同。然說在當時。必無訛悞。知唐書之疎舛多矣。此書所以貴舊本也。集首永樂七年伍德記一篇。稱兵燹之後。散佚僅存。錄而藏之。至嘉靖間。其子孫始爲梓行。而訛舛特甚。又參考本傳及文粹文苑英華諸書。其文不載於集者尙多。今旁加搜輯。於集外得頌一首。箴一首。表十八首。疏二首。狀六首。策三首。批答一首。序十一首。啓一首。書二首。露布一首。碑四首。墓誌九首。行狀一首。凡六十一首。皆依類補入。而原集目次錯互者。亦詮次更定。仍釐爲二十五卷。庶幾復成完本焉。

萬有文庫

第二集七百七種

總編纂者

王雲五

商務印書館發行

張燕公集目錄

卷一

賦五首

卷二

詩五十六首

卷三

詩六十七首

卷四

詩八十首

卷五

詩九十三首

卷六

頌二十三首

卷七

詩三十四首

頌四首

卷八

贊十九首

箴三首

銘五首

記一首

卷九

表二十四首

卷十

表二十一首

卷十一

疏二首

狀七首

對策三首

批答一首

卷十二

序十一首

卷十三

啓一首

書二首

露布一首

卷十四

碑銘七首

卷十五

碑銘三首

卷十六

碑銘五首

卷十七

碑銘六首

卷十八

碑銘六首

卷十九

碑銘四首

卷二十

碑銘四首

卷二十一

碑銘八首

卷二十二

墓誌銘九首

卷二十三

墓誌銘十一首

卷二十四

墓誌銘六首

卷二十五

祭文十九首

行狀一首

張燕公集卷一

唐張說撰

賦

喜雨賦應制

史臣啓先王之冊府。校絕瑞於祥經。樂雲雨之平施。齊品物之流形。皇帝益重而爲寶。麟鳳自輕而讓靈。況愆時而渴望。欲意達而神聽。是月也。朱明漸半。紫油未吐。恐降災兮此下人。罄虔祈兮我仁主。退象龍之禮禱。斥持鸞之貌舞。屏翳慙其廢職。祝融悔其遷怒。山決漉而出雲。天霧澣而下雨。速一言而感應。尅三日而周溥。氣翳靄以駭豔。聲颯灑以蕭條。繄如銀漢之屑落。燦似珠泉之噴澆。街鄽漫其潢潦。臯壤萎其綠苗。舒四溟之清潤。卷六合之煩囂。咸澡骨於神液。共歡心於聖朝。借如五月有梅雨之名。三春有穀雨之氣。越人以泥牛待沃。胡士賣土龍求費。出員嶠而石香入成都而酒味。彼偏方與小節。非大人之所貴。復有送山祇於鬱島。迎海若於葛川。疾雷碎其山裂。走電煜其海燃。天子作愁霖之賦。詞人綴苦雨之篇。牆屋壞於倒井。黍稷沉於下田。乃凶祲之不令。曷休徵之有焉。請言瑞雨之可喜也。協氣交泰。嘉生是賴。洪覃而不溺。衍溢而不害。東漸出日之表。西被無雷之外。南窮火鼠之譯。北盡燭龍之會。天文則雲漢昭回。王澤則江河滂沛。雖欲談天而窺管。孰知堯德之爲大。

進白鳥賦

咨大鈞之播氣。在品物而流形。有莫黑之凡族。亦變白而効靈。感上仁於孝道。合中瑞於祥經。若夫事出神妙。理包舒卷。既集王室。飛隨帝輦。捧日高翥。迎風細轉。識句句於招呼。每啞啞於啄吮。以其霜羽雪毛。冰精玉狀。拔奇綠林之下。賞異紫臺之上。瞰鵠鵲之妙臆。抱鳳凰之衣桁。恐同類之見嫉。畏不才之速謗。願悉命於渥恩。豈顧私於閒放。維聖君之靈囿。物何遠而不臻。有能言而可重。或善舞而取珍。羞陋軀而入獻。與寶羽而爲隣。探朝噪之聲樂。眷夜啼之曲新。無芒距以耀武。不鉤觜以懷仁。謝先容而特達。却假飾以全真。鑒深心於反哺。移報德於君親。

虛室賦

明月窗前。古樹簷邊。無北堂之樽酒。絕南鄰之管絃。理涉虛趣。心階靜緣。室惟生白。人則思元。厭百慮之勞止。歸一途之兀然。嗟乎。巧智首亂。禮樂增矯。名起異端。利成貪兆。役二見之交戰。驅五神而雜擾。形何費而不衰。性何煩而不夭。每竭源而追末。必亡多而獲少。玉帳瓊宮。圖侈務豐。朱門金穴。恃滿於隆。榮與辱而俱盛。事隨憂而不窮。陷營爲之桎梏。留健羨之池籠。心元是幻。法本皆空。莫不因無證實。假異生同。魚何知而樂水。蛇何意而憐風。大哉默識。守此元通。顧瞻天下。還如夢中。

江上愁心賦寄趙子

江上之峻山兮。鬱崎嶇而不極。雲爲峯兮。烟爲色。歛變態兮。心不識。江上之深林兮。杳冥濛而不可見。鳥爲花兮。猿爲子。紛盪瀟兮。言莫擬。夏雲陰兮。若山。秋水平兮。若天。冬沙飛兮。淅淅。春草靡兮。芊芊。感四節之

默運知萬化之潛遷。伴衆鳥兮寒渚。望孤帆兮日邊。雖欲貫愁腸於巧筆。紡離夢於哀絃。是心也。非模放之所逮。將有言兮是然。將無言兮是然。

畏途賦

青泥路。白馬關。雲足躡。霞手攀。忠臣往兮孝子還。陟羊腸。臨鳥道。搏絕岸。援蔓草。懸梁。變娜以樹接。虛閣穹崇而烟抱。風雨櫛汨兮。崩泉而險湍。圖畫詭屈兮。紅峯而碧巒。林黝黝而人靜。山參參而地寒。客有夢兮在城闕。背芳萱兮心不歇。憫秋草之墜露。弔窮崖之飛月。聞哀猿之一鳴。憂人宿昔兮生白髮。

詩

侍宴武三思山第應制賦得風字

梁王池館好。曉日鳳棲通。竹町羅千衛。蘭筵降兩宮。清歌芳樹下。妙舞落花中。臣覺筵中聽。還如大國風。

侍宴蘂荷亭應制

迴鑾青岳觀。帳殿紫烟峯。仙路迎三島。雲衢駐六龍。園林看化塔。壇壝識餘封。山外聞簫管。還如天上逢。

侍宴臨渭亭應制

青郊上巳艷陽年。紫禁皇遊拔渭川。幸得歡娛承湛露。心同草樹樂春天。

侍宴滻水應制賦得濃字

千行發御柳。一葉下仙筵。青浦宸遊至。朱城佳氣濃。雲霞交暮色。草樹喜春容。藹藹天旗轉。清笳入九重。

桃花園馬上應制

林間艷色驕天馬。苑裏濃粧伴麗人。願逐南風飛帝席。年年含笑舞青春。

侍宴隆慶池應制

靈池月滿直城隈。黻帳天臨御路開。東沼初陽疑吐出。南山曉翠若浮來。魚龍百戲分容與。鳬鷁雙舟較汭洄。願似金堤青草馥。長承瑤水白雲盃。

奉和春日幸望春宮應制

別館芳菲上苑東。飛花澹蕩御筵紅。城臨渭水天河靜。闕對南山雨露通。繞殿流鶯凡幾樹。當溪亂蝶許多叢。春園既醉心和樂。共識皇恩造化同。

奉和登驪山閣眺應制

寒山上半空。林眺盡園中。是日巡遊處。晴光遠近同。川明分渭水。樹暗辨新豐。巖壑清音暮。天歌起大風。

奉和幸白鹿觀應制

洞府寒山曲。天遊日旰迴。坡雲看石鏡。拂雪上金臺。竹磴龍驂下。松庭鶴轡來。雙童還獻藥。五色耀仙才。

扈從幸韋嗣立山莊應制二首

寒灰飛玉管。湯井駐金輿。既得方明相。還尋大隗居。懸泉珠貫下。列帳錦屏舒。騎遠林逾密。笳繁谷自虛。門旗暫複磴。殿幕裏通渠。舞鳳隨公主。雕龍賦婕妤。地幽天賞洽。酒樂御筵初。菲才叨侍從。連藻愧應徐。

西京上相出扶陽。東郊別業好池塘。自非仁智符天賞。安能日月共迴光。

奉和送金城公主應制

青海和親日。潢星出降時。戎王子脅龍。漢國舅家慈。春野開離讌。雲天起別詞。空彈馬上曲。詎減鳳樓悲。

奉和同皇太子過慈恩寺應制二首

翼翼宸恩永。煌煌福地開。離光昇寶殿。宸氣繞香臺。上界旛花合。中天日月來。願君無量壽。仙藻屢徘徊。

先天應令

三陽麗景早芳辰。四序嘉園物候新。梅花百般障行路。垂柳千條暗迴津。鳥驚直爲飛風葉。魚躍都由怯岸人。惟願聖主南山壽。何愁不賞萬年春。

奉和春日出苑應制

禁林艷裔發青陽。春望迢迢出畫堂。雨洗亭臯千畝綠。風吹梅李一園香。鶴飛不去隨青管。魚躍翻來入綵航。睿賞歡承天保定。道文更覩日重光。

奉和喜雪應制

聖德與天同。封巒欲報功。詔書斯日下。靈感應時通。觸石雲呈瑞。含花雪兆豐。積如沙照月。散似麵從風。舞集仙臺上。歌流帝樂中。遙知百神喜。灑路待行宮。

奉和同劉兕喜雨應制

青氣和春雨。知從岱嶽來。行雲避師出。洒雨待車迴。厭浥塵清道。空濛柳映臺。最宜三五夜。晴月九重開。

奉和暇日遊興慶宮作應制

漢武橫汾日。周王宴鎬年。何如造區夏。復此睦親賢。巢鳳新成閣。飛龍舊躍泉。棣華譔尚在。桐葉戲仍傳。禁籞氛埃隔。平臺景物連。聖慈良有裕。王道固無偏。問俗兆人阜。觀風五教宣。獻圖開益地。張樂奏鈞天。侍酌衢樽滿。詢芻諫鼓懸。永言形友愛。萬國共周旋。

奉和觀拔河應制

今歲好拖鉤。橫街敞御樓。長繩繫日住。貫索挽河流。鬪力頻催鼓。爭都更上籌。春來百種戲。天意在宜秋。

奉和寒食作應制

寒食春過半。花濃鳥復嬌。從來禁火日。會接清明朝。鬪敵鷄殊勝。爭毬馬絕調。晴空數雲點。香樹百風搖。改木迎新燧。封田表舊燒。皇情愛嘉節。傳曲與簫韶。

奉和過寧王宅應制

進酒忘憂觀。簫韶喜降臨。帝堯敦族禮。王季友兄心。竹苑龍鳴笛。梧宮鳳繞林。大風將小雅。一字重千金。

奉和同玉真公主遊大哥山池題石壁二首

池如明鏡月華開。山學香爐雲氣來。神藻飛爲鵲鶴賦。仙聲颺出鳳凰臺。

綠竹初成苑。丹沙欲化金。乘龍與驂鳳。歌吹滿山林。爽氣凝情迥。寒光映浦深。忘憂題此觀。爲樂賞同心。

奉和賜諸州刺史應制

文明遍禹跡。鰥寡達堯心。正在親人守。能令王澤深。朝廷多秀士。鎔鍊比精金。犀節同分命。熊軒各外臨。聖主賦新詩。穆若聽薰琴。先言教爲本。次言則是欽。三時農不奪。午夜犬無侵。願使天宇內。品物遂浮沉。寄情羣飛鶴。千里一揚音。共躡華胥夢。龔黃安足尋。

奉和賜崔日知應制

聖情留曩鎮。佳氣翊興王。增戟雄都府。高車轉太常。川橫八諫闕。山帶五龍長。連帥初恩命。天人舊紀綱。餞塗飛御藻。闔境自生光。明主徵循吏。何年下鳳凰。

奉和送王峻巡邊應制

六月歌周雅。三邊諗夏卿。欲施攻戰法。先作簡稽行。禮樂知謀帥。春秋識用兵。一勞堪定國。萬里卽長城。策有和戎利。威傳破虜名。軍前雨灑道。樓上月臨營。別藻瑤華降。同衣錦櫟榮。關山由義近。戈甲爲恩輕。絲竹路傍散。風雲馬上生。朝廷謂吉甫。邦國望君平。

奉和送宇文融安輯戶口應制

至德臨天下。勞情遍九圍。念茲人爲本。蓬轉將何依。外避征戍數。內傷親黨稀。嗟不逢明盛。胡能照隱微。栢臺簡竹李。蘭殿賜朝衣。別曲動秋風。恩令生春輝。使出四海安。詔下萬心歸。忤非夔龍佐。徒歌鴻鴈飛。